

M223: Vorauer Sündenklage

- 0,1 DN-E LaBia Mea aperies .
0,2 nu gestade herre mir des .
0,3 daz ich din lop gesprechen mege .
0,4 minen munt insliuz un- phlege .
0,5 der werche miner zunge .
0,6 daz ich dich bitten kunne .
0,7 daz gib du mir heiliger crist
0,8 Sancte MaRIa du da bist .
0,9 wareu muoter . reiniu maget .
0,10 zu miner helue wis geladet;
0,11 Ich han uon minen sulden .
0,12 des oberisten hulde .
0,13 uerlorn also harte .
0,14 durch willen der worte .
0,15 der dir der engel zu sprach .
0,16 do er dir die heren botschaft .
0,17 allererist kundet uon gote .
0,18 nu wis huote ein bote .
0,19 an dinen einbron sun .
0,20 an unseren herren .
0,21 an den waren heilant .
0,22 der allez manchunne enbant .
0,23 drut frowe mit dire .
0,24 zu sinen hulden hilf du mir .
0,25 durch willen der geburde .
0,26 her in dise werlt geboren .
0,27 harte uorhte ich sinen zorn .
0,28 wande ich mih sculdigen weiz .
0,29 nu biuilhe ich frowe minen geist .
0,30 zu diner helue wariu maget .
0,31 allez daz si dir gechlaget .
0,32 daz mir iemer gewerre .
0,33 ia gedrwe ich dir uerre;
0,34 Himelisgiu chuniginne .
0,35 wie uerre ich an dich dinge .
0,36 daz heil miner sele .
0,37 durch willen der eren .
0,38 der dir got des tages irbot .

0,39 do er durch aller suntaere not .
0,40 in dinen reinen buch cham .
0,41 z einer muoter er dich nam .
0,42 uzzer allen wiben .
0,43 ze sele unde ze libe .
0,44 getruwe ich uil wol dir .
0,45 ein bote wis hiude mir .
0,46 an den hiligen crist .
0,47 ein teil du mir s sculdig bist .
0,48 daz du mir heluest umbe got .
0,49 wande du den ewigen lop .
0,50 durch die sundere inphienge .
0,51 unde ne were nie nieman .
0,52 mit sunden beuangen .
0,53 so waer iz unergangen .
0,54 daz got mit dir getan hat .
0,55 nu suche ich armer dinen rat .
0,56 diner helue ist mir not .
0,57 durch den heiligen tot .
0,58 den der ware gotesun .
0,59 an deme heren cruce nam .
0,60 durch allez daz mannes chunne .
0,61 nu uerdilige mine sunde .
0,62 unde heile miner sele .
0,63 die hulde mines herren .
0,64 di hilf mir gewinnen .
0,65 duo . gotes gebererinne .
0,66 nu ne la mih under wegen niht .
0,67 uon dir daz ewige liht .
0,68 uber alle dise werlt irscin .
0,69 nu hilf mir sundere heim .
0,70 uz diseme wurmgarten .
0,71 da wir in geworfen wurden .
0,72 durh Adames missetat .
0,73 der aller mannne chunne hat .
0,74 irworuen michel arbeit .
0,75 mit siner chelgitechheit .
0,76 Nuo hore du urovwe minen ruof .
0,77 dich da got zuo diu gescuof .
0,78 e ich ie wurde .
0,79 daz du die burde .
0,80 di er uof sich nam .
0,81 do ir in dise werlt cham .
0,82 mitsamt ime huobest .
0,83 in dinen buche duo in truogest .
0,84 maget wesende . du in geberest .
0,85 sin chintamme du werest .
0,86 zu dem uronen sale . du in brehdest .

0,87 windelline du ime gedahtest .
0,88 do du in inphienge .
0,89 muterlichen du in begienge .
0,90 an dinen brusten du in zuoge .
0,91 in egyptu- duo mit im fluohe .
0,92 do du diu werch mit im worhtest .
0,93 wie harte du sin do uorhtest .
0,94 gedruobet du an im diche wurde .
0,95 do hulue du im die burde
0,96 wol tragen mit uollen .
0,97 maget umbewollen .
0,98 Uil harte truoge du die burde .
0,99 do du daz din chint .
0,100 an dem uronen cruce sahe hangen .
0,101 do we iz dir irgangen .
0,102 also der wissage sprach .
0,103 do er uil uerre hie beuor sach .
0,104 den dinen michelen lop .
0,105 unde al daz der ware got .
0,106 mit dir tuon wolde .
0,107 er sprach daz ein sterne solde .
0,108 uon dem herren iacobe chome .
0,109 da uone wurdest duo urovwe uernomen .
0,110 dennen wurde ein chint geboren .
0,111 des ser solde durchuaren .
0,112 maget dine sele .
0,113 iz solde wesen herre
0,114 uber elliu diu riche .
0,115 er sah iz waerlichen .
0,116 do daz also irgie .
0,117 daz man dinen sun hie .
0,118 do wart mit sere .
0,119 din heiligi sele .
0,120 uil harte beuangen .
0,121 er mah tich uon dannen .
0,122 zuo deme sternem wole zelen .
0,123 wande dich got selbe zu dem lichte wolde erwelen .
0,124 daz uns da sol wisen .
0,125 zu deme uronen paradyse .
0,126 Also der mersterne .
0,127 den scefman leitet uerre .
0,128 uber genen breiden se .
0,129 uns tet diu uinstre da beuor we .
0,130 do du maget do irscine .
0,131 do was diu sorge hine .
0,132 do was druren gestoret .
0,133 vroude irhoret .
0,134 uon den engelen hie in erde .

0,135 uil salich du do wurde .
0,136 her in dise werlt geborn .
0,137 wande aller der zorn .
0,138 unde elleu diu uientschaft .
0,139 diu under mennicken unt under gote was .
0,140 mit dir zu suone hat braht .
0,141 uone diu so han ich mir gedaht .
0,142 daz ich alles mines scaden .
0,143 zuo dir fluht welle haben .
0,144 Frow uber allez daz dir ist .
0,145 dich der heilige crist .
0,146 des wirdich hat bedaht .
0,147 daz du lop hast braht .
0,148 uber alle dise erde .
0,149 nu solt du gote werde .
0,150 mine dige irhoren .
0,151 du da zu den niun choren .
0,152 michele urovwede hast gegeben .
0,153 den zwelfboten . unde den wissagen .
0,154 unde den martereren .
0,155 den bihteren . also heren .
0,156 unt patriarchen .
0,157 mit dinen starchen werchen .
0,158 die hast du gezieret .
0,159 unde hast die mandunge braht .
0,160 uil manich sele hiut hat .
0,161 gedingen in der helle .
0,162 daz in der behwelle
0,163 uon dinen werchen werde rat .
0,164 got mit dir zebrochen hat .
0,165 di uesten helleporten .
0,166 mit gedanchen unde mit worten .
0,167 noch mit cheiner slahte dinge .
0,168 so ne chan ich uuore bringen .
0,169 di guote di an dir sint .
0,170 du bist des obristen kint .
0,171 unde bist doch sin muoter .
0,172 uone diu so tut er .
0,173 vrovwe allez daz duo wil .
0,174 nu n ist miner sunden nie so uil .
0,175 siner guote ne si mere .
0,176 ich bite dich durch sine ere .
0,177 daz du ledegest minen geist .
0,178 den du in angesten . weist .
0,179 Duo bete ich dich gerne .
0,180 vrovwe uil uerre .
0,181 want ich waerlichen weiz .
0,182 wil du ledegen minen geist .

0,183 der mir da ist benomen .
0,184 so solt du mir ze helue chomen .
0,185 swenne ich disen lip urende .
0,186 des bite ich dich durch willen der urstende .
0,187 der der taete uon dem grabe .
0,188 der dich da zuo gesezet habe .
0,189 ze frowwen uber elleu dinch .
0,190 dem wole kunt sint .
0,191 alle mine sorgen .
0,192 ieh ne was zu niht worden .
0,193 daz was mir ungewizzen .
0,194 got hete sich geulizzen .
0,195 wi er mohte gehieren unde geren mine sele unde minen lip .
0,196 unt han ich mich des selbe sit .
0,197 also harte uerstozen .
0,198 er wolde mich genozen .
0,199 den engelen in den hohen .
0,200 uber die nuon chore .
0,201 wolde er mich sezen .
0,202 daz mich des iht mege lezen .
0,203 daz bewar du chunniginne .
0,204 durch der wile willen .
0,205 daz dir got ie chunt wart .
0,206 nu offene mir die widerwart .
0,207 denne ich her uerheret si .
0,208 drut frowwe nuo stant mir bi .
0,209 als ich dir des wol getruwe .
0,210 wi ungerne ich nu buwe .
0,211 diz uinster lant .
0,212 z einem boten wis du mir gesant .
0,213 an den der da wol mach .
0,214 mir geben den ewigen tach .
0,215 daz er mich uuore hinnen .
0,216 sciare dar bringe .
0,217 da ich habe liep an leit .
0,218 frowde an arbeit .
0,219 da ich mich iemermere mende .
0,220 ewiclichen an ende .
0,221 mit allen den die der gotes chint .
0,222 mit dinen werchen worden sint .
0,223 Frowwe uolliu guotes .
0,224 durh willen des bludes .
0,225 daz got an dem cruce uz goz .
0,226 unde durch willen des wazeres daz uon siner siten floz .
0,227 gemisket mit drore .
0,228 nu uernim mich suntere .
0,229 ende hilf mir daz ich uon deme tiuuele werde enbunden .
0,230 durch willen der uinf wunden .

0,231 der got durch unsich irliten habe .
0,232 unt durch willen aller der tage .
0,233 die er uon dir getragen wurde .
0,234 unde durch willen diner uferte .
0,235 die du ze himele tete .
0,236 nu hilf mir uz dirre note .
0,237 uz disem ubelen woftale .
0,238 unde brinch mich zu deme uronen sale .
0,239 da got den ewigen lon git .
0,240 nu ledige chunigin inzit .
0,241 mine uil arme sele .
0,242 durch des grabes ere .
0,243 da der uil salige inne lach .
0,244 der sinen lip umbe unsich gap .
0,245 Nu hilf mir heilbringe .
0,246 wariu uogedinne .
0,247 aller der uerherten .
0,248 die diniu werch nerten .
0,249 du brehte in die wideruart .
0,250 mit dir diu uinstere wart .
0,251 zu dem liehte uerwandelot .
0,252 mit dir der ewige tot .
0,253 aller wart zestoret .
0,254 uon dir wart irhoret .
0,255 in der helle mandunge .
0,256 mit dir wart gewonnen .
0,257 an deme divuele sin ueste .
0,258 aller magde beste .
0,259 uon rehte man dich bitten scol .
0,260 mit dir der Adames ual .
0,261 wart braht zuo guode .
0,262 mit dir wart diu huote
0,263 allen mennicken gegeben .
0,264 daz ir die engele sulen phlegen .
0,265 beidv naht unde tach .
0,266 uil wol du nu heizen maht .
0,267 porta paradyses .
0,268 tuore des himelriches .
0,269 muoter des heiles .
0,270 tilegerinne alles leides .
0,271 aller gute bist u uol .
0,272 din gnade diu sol .
0,273 mich ledegen . uon miner meile .
0,274 durch willen der reinen .
0,275 der ime got selbeme behielt an dir .
0,276 nu hilf trut frowe mir .
0,277 unde habe irbarmede uber mich .
0,278 des bitte ich armer minniske dich .

0,279 durch willen der note .
0,280 der daz herze dines sunes an dem cruce hete .
0,281 do er hangende dr ane toute .
0,282 unde durch willen aller der werche da er dich ie mite fruote .
0,283 so hilf mir armen umbe got .
0,284 diu wort diu er selbe chot .
0,285 daz er diu ane mir bewere .
0,286 er sprach nine wolde tot der sundare;
0,287 Scephaere aller dinge .
0,288 nu uernim mine stimme .
0,289 durch sande peteres willen .
0,290 der durch dine minne .
0,291 an daz breit mere trat .
0,292 durch die liebe daz er dich gerne gesach .
0,293 so uernim herre mine gebete .
0,294 allez daz ich ie getete .
0,295 wider dinen hulden .
0,296 des wil ich mich suldigen .
0,297 zu dinen gnaden geben .
0,298 unde wil dir rihten unze ich lebe .
0,299 ob du nu ruochest min .
0,300 so sol ich ein riwesere sin .
0,301 unze an minen ende .
0,302 nu solt du mir senden .
0,303 dinen heiligen geist .
0,304 wande du herre uil wol weist .
0,305 daz elliū miniu dinch
0,306 ane dine helue inwiht sint .
0,307 nu ledige herre mir diu bant .
0,308 da mide mich der ubele ualant .
0,309 hat gebunden so diche .
0,310 uon sinen manegen strichen .
0,311 moht ich mich niht behuoten .
0,312 mir ne wellen heluen dine guote .
0,313 Got duo solt mich alle zit bewaren .
0,314 daz ich rehte geuare .
0,315 des bit ich dich herre .
0,316 dureh des ganges ere .
0,317 den du zu dem cruce gienge .
0,318 do dich di iuden hiengen .
0,319 unde durch willen der geburte .
0,320 daz du geborn wurde .
0,321 durch allez mankunne .
0,322 nu uergip mir mine sunde .
0,323 du uil heiliger crist .
0,324 duo daz eine bist .
0,325 wider den ich gesundet han .
0,326 deme ich ouch in rede sol gan .

0,327 der mir ovch urteilen sol .
0,328 den minen freislichen ual .
0,329 sol bringen ze rehte .
0,330 nu hilf dinem chnete .
0,331 durch dinen heiligen tot .
0,332 des ist mir durft unde not .
0,333 Uarre got der getruwe .
0,334 nu mich mine sunde riuwen .
0,335 unde ich si ouch gerne buozen welle .
0,336 nu habe irbarmede uber mich .
0,337 des bite ich armer menske dich .
0,338 durch aller heiligen ere .
0,339 nu hilf mir daz ich mine sele .
0,340 inphure uon deme bechen .
0,341 uber den lip solt du daz rechen .
0,342 der ist suldich wider dich .
0,343 da mit wil ich .
0,344 dir uil gerne gelten .
0,345 daz ich dir so selten .
0,346 han gelonet mit gute .
0,347 daz du mich mit dinem bluote .
0,348 chouftest uon der helle .
0,349 unde uon der heizen bechwelle .
0,350 swa ich des uergezzen han .
0,351 da han ich uerre getan .
0,352 wider mineme heile .
0,353 da wil ich mir selbe umbe irteilen .
0,354 den dinen michelen gerich .
0,355 in diseme libe uber mich .
0,356 daz mir dort ze leide solde werden .
0,357 daz irteile ich ungerne .
0,358 daz wurde lihte ze lenge .
0,359 dize geniemet sciene ende .
0,360 daz du mich sin hie ingaltetest .
0,361 unde du den geist behaltest .
0,362 des sist du herre iemer gelobet .
0,363 ich was irtoret unde irtobet .
0,364 daz ich des ie uergaz .
0,365 der da scephaere was .
0,366 uber himel unde uber erde .
0,367 daz er riuhte werden .
0,368 ein armer menniske durh mich .
0,369 owe war dahte ich .
0,370 daz ich niht enzit uof en sach .
0,371 disiu werlt hat mir rezeiget daz .
0,372 wi ir lon ist getan .
0,373 daz ich ir so uil gedienet han .
0,374 daz muoze got erbarmen .

0,375 si betriuget manegen armen .
0,376 der wanet daz er riche si .
0,377 er gelit ze iungest der bi .
0,378 uil harte erbarmiclichen .
0,379 nach deme ewigen riche .
0,380 weruen nu alle die der sin .
0,381 daz ist hinen uurder der rat min .
0,382 daz ist staete unde guot .
0,383 owi wi boslich er tuot .
0,384 der iz niene chophet e .
0,385 e . der marchet zege .
0,386 ime chumt her nach daz zit .
0,387 e sin sele begebe den lip .
0,388 ob elleu div werlt sin eigen waere .
0,389 daz er si gerne gaebe .
0,390 truwet er s iht geniezen .
0,391 daz er den lip lieze .
0,392 ze buluer uerbrennen .
0,393 iz ist enwiht denne .
0,394 den der tiuvel so betrivget .
0,395 daz er iz dar geseubet .
0,396 dem hat er daz halmel uor gezogen .
0,397 unz er in gar hat betrogen;
0,398 Got der gewaere .
0,399 nu uernim mich sundaere .
0,400 nu lig ich in dirre tieffe .
0,401 an dine guote ich nu ruofe .
0,402 daz du mir bietest dine hant .
0,403 ez ist leider uil lanch .
0,404 daz ich flos dine hulde .
0,405 sich huoben mine sulde .
0,406 des tages do Adam .
0,407 dir wart ungehorsam .
0,408 do viel ich in daz unreht .
0,409 daz han ich sundiger chneht .
0,410 sit uil diche giteniuwet .
0,411 des bivte ich mine rivwe .
0,412 zu dinen gnaden .
0,413 nu solt du mich inphahen .
0,414 durch necheine mine missetat .
0,415 disiv werlt mich betrogen hat .
0,416 si hat mir armen getan .
0,417 also vil manegem man .
0,418 den sie hat beswichen .
0,419 ein teil han ich iri te harte gegehenget .
0,420 ich uorhte ich habe gelenget .
0,421 die gnist miner sele .
0,422 gnedger herre .

0,423 nu la mich dir erbarmen
0,424 ia chouftest du mihc armen .
0,425 mit din selbes bluote .
0,426 warre got durch dine guote .
0,427 nu uernim riuwigen mich .
0,428 ich wil mich ruogen wider dich .
0,429 ich bin z der wirsiste man .
0,430 der den namen ie gewan .
0,431 daz er cristen solde sin .
0,432 nu la du zorn din .
0,433 uber mich uerworhten niht gan .
0,434 dar nah unde ich daz garnet han .
0,435 so waere ich ewiclichen ulorn .
0,436 in den sunden wart ich geboren .
0,437 mit sunden mich diu muoter enphie .
0,438 die ich auer in der toufe lie .
0,439 da gehiez ich cristenlichiu dinch .
0,440 diu han ich gare erlogen sint;
0,441 Gnediger herre .
0,442 nu uorhte ich mir sere .
0,443 want ich mich suldigen weiz .
0,444 aller dinge ich mich uleiz .
0,445 diu waren wider dir .
0,446 die solt du uergeben mir .
0,447 durch diner muoter willen .
0,448 mine sulde sint niht ringe .
0,449 ir ist laider so uil .
0,450 ein tail ich dir nu clagen wil .
0,451 der ich nu gehugen mach .
0,452 unde sezze ich naht unde tach .
0,453 so ne dorft ich niemer gedagen .
0,454 ob ich allez solde sagen .
0,455 wande ich uie dar zuo .
0,456 leider uil fruo .
0,457 do ich in der wigen lach .
0,458 do ne uerliez ich nie nieneiheinen tach .
0,459 i ne getrupte mine muter .
0,460 ich tete ir luzel guotes .
0,461 ich ne tet ir niwar leit .
0,462 uil manege bosheit .
0,463 han ich sit begangen .
0,464 min lip was beuangen .
0,465 mit aller achuste .
0,466 under minen brusten .
0,467 so ne was niuwar zorn unde nit .
0,468 untriuwe un- ubermuote .
0,469 aller unguote .
0,470 was min herze ie uol .

0,471 rehter dinge we iz hol;
0,472 Dem ich wol zu sprach .
0,473 ich ne uerliez iz nie durch daz .
0,474 ich ne riete ime an sine guot .
0,475 mit den gedanchen ich in sluch .
0,476 ich honde in mit der zungen .
0,477 ich ne sprach mit dem munde .
0,478 niewar huoh unde spot .
0,479 so ich scolde sprechen din lop .
0,480 so was ich unmuozech .
0,481 daz has tu wol gebuozet .
0,482 des sag ich dir gnade .
0,483 ze chirchen was ich trage .
0,484 gerne ich rouppte unde stal .
0,485 daz unrehte ich uerhal .
0,486 mere dan ich solde .
0,487 neheine maze ich ne wolde
0,488 mit huore began .
0,489 dem manne ich sine konen nam .
0,490 michel unreht ich begie .
0,491 nechein wip ich ne lie .
0,492 ich si mit ir geuallen .
0,493 mit werchen ode mit willen .
0,494 ode mit sogetanen gebaren .
0,495 die hurlich waren .
0,496 da mich auer iehtes umbe was .
0,497 vil sciere urvmet ich daz .
0,498 daz ich alzoges guot wip .
0,499 ze leide brahte ir lip .
0,500 mit unrechten mannen .
0,501 des han ich uil begangen .
0,502 Ich han mit meineiden .
0,503 getan so uil ze leide .
0,504 miner armen sele .
0,505 ich phlac des ie herre .
0,506 daz ich ein rechere was .
0,507 der mir iht getet oder gesprach .
0,508 ich rach halt andere luote dinch .
0,509 an dinen werchen was ich blint .
0,510 tore unde stumme .
0,511 owi wi wol ich daz chunde .
0,512 mit ubele gewinnen .
0,513 div heilige minne .
0,514 diu was mir ie uerre .
0,515 nu hete ich sie gerne .
0,516 nu hore ich wol sagen .
0,517 swelh man ir nine habe
0,518 er uerliese allez daz gut .

0,519 daz er iemer geduot .
0,520 des sorge ich mir harte .
0,521 necheineme ewarten .
0,522 chom ich niht ze bihte .
0,523 nie so lutterlichen .
0,524 so ich uon rehte solde .
0,525 swenne ich auer denne wolde .
0,526 die maze iemer iht began .
0,527 wande min gnist dar ane scolde stan .
0,528 des ich denne da gehiez .
0,529 des ne geleiste ich niht;
0,530 Swenne ich solde uasten .
0,531 so scalt ich den phaphen .
0,532 der mir die buoze gebot .
0,533 ze nihte uorhte ich den tot .
0,534 ich wande iemer solde ich leben .
0,535 ich han uil diche einem anderen gegeben .
0,536 de iz mir leit waere .
0,537 swer mir iz gebe .
0,538 swenne ich herre ie genam .
0,539 dinen heren lichnamen .
0,540 den behielt ich unrehte .
0,541 daz uergip du mir drehtin .
0,542 swie here daz zit was .
0,543 ieh ne uerliez iz nie durch daz .
0,544 ich in begienge minnen willen .
0,545 uberlut unde stille .
0,546 so han ich diche dich uermanet .
0,547 swa ich auer iemannen uant .
0,548 der ein irraere was .
0,549 der geuiel mir al deste baz .
0,550 den chos ich mir ze gesellen .
0,551 nu mohte ich iemer zellen .
0,552 daz ich iz doh niemer uolzalte .
0,553 da mit ich mich ualte;
0,554 Des ich dir nu ueriehen han .
0,555 unde alles des des ich han getan .
0,556 mit worten ode mit willen .
0,557 mit deheiner slahte dinge .
0,558 daz uergip du mir herre .
0,559 durch d grabes ere .
0,560 da du lage inne .
0,561 unde durch dines heiligen crucis willen .
0,562 da du ane neme den tot .
0,563 durch aller sunaere not .
0,564 du rihtiz uber min fleisch .
0,565 daz der min arme geist .
0,566 niht uerlorn werde .

0,567 ich was ein blodiv erde .
0,568 unde bin hiute so bose .
0,569 solt ich mich irlosen .
0,570 dir herre gehuldigen .
0,571 aller miner schulde .
0,572 ich uil harte uersumet ware .
0,573 dem leidigen wizenære .
0,574 dem wurde sin gehalten ze uile .
0,575 ein teil ich is nu uil
0,576 gerne hie gebuozen .
0,577 daz ich daz getun muoze .
0,578 daz gip du mir heiliger crist .
0,579 du da scephaere bist .
0,580 uber himel unde uber erde .
0,581 nu hilf mir daz ich dir noch rehter werde .
0,582 uor minem ende .
0,583 des bit ich dich durch dei gebende .
0,584 die du doltest uon den iuden .
0,585 nu ruche herre mich ze uridenne .
0,586 Uor dem ubelen hunde .
0,587 der ie z allen stunden .
0,588 wiruet mit flize .
0,589 daz er mich beswiche .
0,590 er was des leider ane mir gewis .
0,591 des auer obe got wil nien ist .
0,592 daz er mich in der hant hete .
0,593 er scol die selben mite .
0,594 die er mir da wolde geben .
0,595 uil lange ein ubele leben .
0,596 daz ich ir hie uerdienet habe .
0,597 di nim du mir hie abe .
0,598 mit ettelichen dingen .
0,599 daz ich si nine bringe .
0,600 an den urteilichen tach .
0,601 da niemen ne mach .
0,602 sin unreht bescirmen .
0,603 da muzen si gehirmen .
0,604 die hie ir antsage .
0,605 mit ir spehlichen rede .
0,606 da uure bietent .
0,607 ob in ieman riete .
0,608 ir sele gnist .
0,609 des tages iz alzoges ist .
0,610 chomen uz aller slahte rate .
0,611 so suftent si alze spate .
0,612 Duo erchenne ich sundiger chnet .
0,613 uil wol min unrehte .
0,614 unde alle mine schulde .

0,615 herre dine hulde .
0,616 han ich harte uerlorn .
0,617 wol garnet dinen zorn .
0,618 du uil heiliger crist .
0,619 nu weiz ich uil wol daz du bist .
0,620 hiute also gnedich . so do . ware
0,621 do du deme scachaere .
0,622 sine meintaete uerlieze .
0,623 unde du ime uil wol geheize
0,624 nuo wil ich ovch widersinen .
0,625 uil gerne gewinnen .
0,626 herre dine hulde .
0,627 unde wil mich hiute sculdigen .
0,628 in dine gnade geben .
0,629 unde wil dir rihten unze ich lebe .
0,630 nvo ist ovch billich unde reht .
0,631 daz duo enphahest dinen armen choufchnet;
0,632 Herre uber elliu dinch .
0,633 dir da wol muoglich sint .
0,634 minc schulde ze uergebenne .
0,635 nuo uerlich mir ze lebenne .
0,636 unze ich uerworuener scalh .
0,637 uon des tiuueles gewalt .
0,638 unphure mine sele .
0,639 des bitte ich dich herre .
0,640 durch willen der eren .
0,641 diner heren uferte .
0,642 nuo gedenche an mir der worte .
0,643 der du spreche dinen iungeren zu .
0,644 an dine helue ne mohte niemen niht getun .
0,645 daz ist herre uil war .
0,646 Maria diu ne waere nie so manich iar .
0,647 in der wuosten gewesen .
0,648 der tiere spise genesen .
0,649 ane dine guote .
0,650 diu hat mir min gemuote .
0,651 gemachet uil ringe .
0,652 sogetaner dinge .
0,653 di uns uon ir sint gescriben .
0,654 den du here wil beuriden .
0,655 der ist behalden unde irneren .
0,656 ia ist uns von ir daz geleren .
0,657 daz si sich so uerre uerworht hete .
0,658 daz si der luft in lieze .
0,659 ze ierusalem in daz muonster niht .
0,660 unze si rivwen gihiez .
0,661 ze buzzene ir schulde .
0,662 do gewan si dine hulde .

0,663 din gnade ir sa den wech insloz .
0,664 da ze stete si gnoz .
0,665 du uil heiliger crist .
0,666 daz du so guot bist .
0,667 ovch wart si selbe so guot .
0,668 daz si der luft enbore druoc .
0,669 der ir daz munster e benam .
0,670 swen ich sundiger man .
0,671 denche an dine gnade .
0,672 so bin ich uro ze ware .
0,673 so ist mir min gemuote uil ringe .
0,674 sogetaner dinge .
0,675 begienge duo diche uil .
0,676 ich en getar noch ne wil .
0,677 missetruwen diner guote .
0,678 der ofen der da gluote .
0,679 den chuldes tu den chinden .
0,680 daz in dar inne .
0,681 div hizzle nine war .
0,682 dinen engel sandest du dar .
0,683 daz er da mitsamet in sanch .
0,684 din lop warre heilant;
0,685 Swer sich ie zuo dir geuie .
0,686 den uerlieze du nie .
0,687 daz ist offen unde war .
0,688 daz bewarst du wol da .
0,689 an der guoten susannen .
0,690 diu was mit noten beuangen .
0,691 ir wart erteilet der tot .
0,692 unze din gnade do gebot .
0,693 eime kindiscem manne .
0,694 daz er ir half danne .
0,695 an allen ir scaden .
0,696 di si wolden . ulorn han .
0,697 mit luggeme urchunne .
0,698 uber di do urumedest .
0,699 die selben urteile .
0,700 di si ir ze leide .
0,701 heten geraten .
0,702 wande si t mitalle taten .
0,703 an alle ir sulde .
0,704 des uluren si dine hulde .
0,705 Gnediger herre .
0,706 du lostest danyelen .
0,707 der den lewen was gegeben .
0,708 di uil lange waren hungerige gelegen .
0,709 in einem loche .
0,710 daz si in zebrochen .

0,711 scolden haben sciere .
0,712 do gebud duo den tieren .
0,713 daz si sin nine ruorten .
0,714 iene si gar zeuorten .
0,715 di in da dar uuorten
0,716 nu entlip minen sunden .
0,717 durch din selbes guote .
0,718 an dem wege der warheite .
0,719 nuo gip mir geleite .
0,720 heim zuo minem erbe .
0,721 daz wil mir tieuel wergen;
0,722 Kunech aller keisere .
0,723 uater aller weisen .
0,724 uoget aller armen .
0,725 nuo la mich dir erbarmen .
0,726 daz mir min erbe .
0,727 der tieuel wil wergen .
0,728 sol auer ich ein kanpf mit ime uehten .
0,729 des hilf du mir threhtin .
0,730 daz ich armer an im gesige .
0,731 o wi gerne ich in uon mir uertribe .
0,732 daz er mit mir ne hete nechein geuerte .
0,733 sin lon ist herte .
0,734 ich hore wol sagen .
0,735 daz er niht ne habe .
0,736 niemanne ze gebenne .
0,737 wane bech unde swebel .
0,738 diu zwei wallen unde brinnen .
0,739 der werde niemer ende .
0,740 uon ewen unze in ewen .
0,741 sogetane wewen .
0,742 gibet er ze mite .
0,743 mir waere lieber daz er z ime hete .
0,744 Ich wil ime uil gerne entrinnen .
0,745 einen bezzeren lon gewinnen .
0,746 umbe minen scephare .
0,747 wi durft mir nu ware .
0,748 daz ich hete ein brustsloz .
0,749 uur sin ureislic scoz .
0,750 uur sine scerphen strale .
0,751 da mit er an twale .
0,752 uil diche ramet min .
0,753 diu brustwere darf auer niht sin .
0,754 weder horn noch bein .
0,755 noch stal noch stein .
0,756 da wrde ich under irslagen .
0,757 rehten glovben sol ich haben .
0,758 unde di waren rivwe .

0,759 unde die guoten trivwe .
0,760 den stetigen gedingen .
0,761 unde die cristenliche minne .
0,762 dult unde demuot .
0,763 div geweffene waeren uil guot .
0,764 uuor den hunt uerwazen .
0,765 so muos er mir die straze
0,766 rumen zagelichen .
0,767 unde allenthalben intwichen .
0,768 Duo sogetane chamfwat .
0,769 herre niemen ne hat .
0,770 wane deme du sie geben wil .
0,771 nuo waere reht daz wir dich vil .
0,772 innerlichen beten .
0,773 umbe alle die ir nine heten .
0,774 so ich sundiger ne han .
0,775 swenne ich ettewenne stan .
0,776 unde uil gerne bete dich .
0,777 niemer ne mag ich .
0,778 uf guon minen munt .
0,779 so der uerwazene hunt .
0,780 ne waiz wanne zuo uert .
0,781 der allez guot gerne wert .
0,782 hat mir ettewaz braht .
0,783 da er mir di guten andaht .
0,784 sciene mit hat entragen .
0,785 die ich zu dir scolde haben .
0,786 daz chlage ich diner guote .
0,787 dv ne wellest mich behuoten .
0,788 er bringet mich in not .
0,789 durch dinen heiligen tot .
0,790 gedench waz daz ware .
0,791 da duo mich sundere .
0,792 uz werden hieze .
0,793 la mich des geniezen .
0,794 daz du uil wol weist daz .
0,795 daz iz newederez was .
0,796 weder isen noch bein .
0,797 iz was ein broder leim .
0,798 da du mich uz hast geschaffen
0,799 du ne woldest mich uester machen
0,800 ich ne han necheine craft .
0,801 wider die mich herehaft .
0,802 ane uehtent . taegelichen .
0,803 unde mich des ewigen riches .
0,804 uil gerne bestieze .
0,805 ob sie din guote lieze
0,806 wande dich diu gotheit .

0,807 uon himele her in erde treip .
0,808 in einer armen magede buch .
0,809 zu diu daz du hvlfest uf .
0,810 dem der da geuallen was .
0,811 daz du herre ie daz .
0,812 durch unsich getete .
0,813 daz riet dir din gute .
0,814 unde uil uerre din gnade .
0,815 wande wir des unwirdich waren .
0,816 Wie mohte wir daz uerdienet haben .
0,817 daz du dich lieze an slahen .
0,818 spoten unde spiwen .
0,819 daz du dich lieze triben .
0,820 an die stat da man dich hie .
0,821 under die da waren ie .
0,822 zu den scacheren gezalt .
0,823 owi din gotlich gewalt .
0,824 do wolt er sich nider neigen .
0,825 daz er des tages . desten minner nine was .
0,826 die helle er underdiu brach .
0,827 do du in dem tode . himel unde erde .
0,828 allez lieze erweget werden .
0,829 steine di zebrasten dar abe .
0,830 genuoge erstunden an dem tage .
0,831 die uor manegen iaren .
0,832 gar eruulet waren .
0,833 sich zaten diu uber elliu diu lant .
0,834 sich uerwandelote daz lieht .
0,835 der tivuel der ne wesse niht .
0,836 waz er in der mennscheit was .
0,837 di er da uzen ane sach .
0,838 diu gotheit was in uerholn .
0,839 daz er da hete uerstolen .
0,840 im was sin sterchorre chomen .
0,841 daz ime ouch alle die benomen werden .
0,842 di uffte dirre erden .
0,843 sin gebildet nach dire .
0,844 daz gib in unde ouch mire .
0,845 du uil heilige gotes sun; .
0,846 Qui uiuis & regnas p om-a scl-a scl-orum .